

SERVICIO BON DIA



Ban elimina e saconan di plastic



ORANJESTAD - Bayendo bek den tempo nos por recorda con nos mayornan y abuelonan

tawata transporta comestibles y otro articulonnan ora nan haci compras. Primeramente tawata

usa muchila of for di saco di koes tawata traha saco. Despues di cada compra e muchila of saco ta haci e muchila limpi y ta ward'e. Despues a bini e saconan di papel.

Bentaha di saco di papel ta cu e usuarionan ta warda nan despues di cada uso. Tambe si pa un of otro motibo e saco di papel resulta den nos medio ambiente, e cabritonan cu ta cana los ta comenan. E saco di papel ta desintegra despues di corto tempo. Desventaha ta cu si tin demasiado peso den e saco e ta kibra y si bo pone comestible friu e ta kibra masha lihe.

Despues a bin cu e invento di saconan di plastic. Ventaha di saconan di plastic ta cu

nan ta hopi light y fuerte, ta mantene hopi peso y ta ideal oro di compra articulonnan friu.

E desventahanan ta multiple. E saconan aki ta hopi light. Door di e biento fuerte cu nos tin akinan e saconan di plastic ta resulta facilmente den nos medio ambiente. Si bo core rond ariba nos isla tur caminda bo ta mira saconan di plastic, sea banda di caminda den mondi of den matanan di kwihí of lubada. E saconan aki ta penetra asina duro den e matanan aki cu dificilmente por yega na nan.

Ora awa yobe e saco ta keda cu awa den nan y ta causa criadero pa sangurinan cu por transporta e virus di dengue. Tambe e saconan di plastic ta bula bai te banda di nos beachnan y laman. Un bon ehempel ta durante temporada di campamento. Si bo djis para un rato banda di nos beachnan bo por wak cuanto di e saconan di plastic ta bai laman. E tin consecucionan grave pa e parhanan di laman y nos bida marino. Anualmente tin e campaña di Aruba Reef Care Foundation y ta increibel e cantidad di saco di plastic cu e boluntarionan ta

saca for di fondo di lama y e rifnan. E problema mas grandi cu e saconan aki ta, cu ta dura hopi aña prome cu nan desintrega.

A yega e momento pa gara e toro na su cacho y prohibi e uzo di saco di plastic. A yega e momento pa bai bek na nos antepasadonan cu tawata usa e muchila. Awendia e muchilanan ta bin den un forma di shoppingbags colorido y bunita. Y nan uso ta duradero. Tambe nos mester bira mas conciente cu si nos produci sushi ta nos obligashon di deshaci di dje na e forma mas adecua. Informacion di BUVO.